



Fasnecht  
2019



## Mir warte... (nümm ganz useputzt)

Vor langer Zyt so zwei, drei Joor  
eus chunnt das jo wahnsinnig lang scho vor  
het euse Stapi (dr Ex), dr Lukas Ott  
verchündet stolz im Lieschtler Bott  
us Alass vo dere Strossesanierig in dr Rothuusstross  
mache mir es Fescht, mei denn isch öppis los  
mir fiere vom Frytig bis am Sunntig z'Obe  
s'isch öppis los, «dr Bär wird tobe»  
es Fescht, wo Lieschtel no nie het gseh  
verrote will ich do aber no nit meh  
es isch denn d'Zyt vergange und dr Lukas duet verschünde  
dass er uf Basel goht und als Stapi in Lieschtel duet chünde  
sit denn warte mir, mir hei eus useputzt  
in dr Hoffnig, dass das Ganze au öppis nutzt

Im Stadtrout, do isch me verzweiflet und duet schwitze  
jetz loht eus dä Kärli eifach do lo sitze  
me diskutiert und duet überlege, was isch jetz s'Bescht  
mache mir's oder mache mir's nit, das tolle Fescht  
mir wüsse nüt und d'Zyt wird äng  
me glaubt nümm dra, dass es denn au läng  
und so duet me sich denn lo verneh  
es wird sicher so es Stadtfescht in Lieschtel geh  
aber nit im 2018, nei erscht ei Joor später  
dr neu Stapi wird bim brichte rot und rööter  
und so warte mir halt immer no, ganz verduzt  
mir warte, aber nümm ganz useputzt

Me fangt denn au sofort wieder a mit plane  
jetz müesse gueti Lüt und no besseri Idee ane  
d'Verein wärde iglade, me duet se fascht dränge  
machtet mit, alli, sunscht duets au im 2019 nit länge  
betriebe Beizli, Bars und sunschtigi Attraktione  
für alli Lüt, wo in Lieschtel dien wohne  
mir hoffe natürlich au, dass no viel vo Usswärts dien cho  
schliesslich isch eusi Rothuusstross für alli do  
ob Gross, ob Chli, ob Männli oder Wybli  
chömmet uf Lieschtel ans Fescht, sogar au Basler Dybli  
das Fescht wird toll und bleibt sicher unvergässe  
me cha do viel Trinke und no meh Ässe  
doch mir warte halt immer no, he Gottfried-Stutz(t)  
mir warte eifach, aber nümm useputzt

S'Datum stoht fescht, so Afangs Septämber  
goht das Fescht über d'Bühni, nit erscht im Novämber  
denn isch euses Stedti, und vor allem d'Rothuusstrosse  
ei Feschtzält, mei denn isch d'ört öppis los  
Beiz an Beiz und Bar an Bar, wo obe bis unde  
mit viel Plätz für d'Bsuecher vo däm Fescht, also d'Chunde  
e Stimmig wie an dr Fasnacht soll denn si  
au mir sin denn im Stedtli und sicher drbi  
das Fescht, das lön mir eus nit lo entgoh  
mir mache mit und stönde do  
nir hoffe eifach, dass euses Engagement au nutzt  
sunscht si mir denn no weniger useputzt

So, fertig jetz mit jomere und reklamiere  
mir dien jetzt grad wieder dur's Stedtli marschiere  
will s'einzig ächte Fescht im Joor, das isch doch klar  
isch d'Fasnacht, die isch im März oder im Februar  
denn isch im Stedtli immer öppis los  
Alt und Jung si do und uf dr Stross  
sit viele Joor, do duet euses Komitee d'Fasnacht organisiere  
und passt uf, dass alles lauft und nüt cha passiere  
e Verschiebig, die wird's nie geh, nei  
stell dir emol vor, d'Fasnacht wär im Mai  
nei, mir bliebe drbi und säge's ganz stolz  
d'Fasnacht, die isch toll und us guetem Holz  
mir müesse nit warte, nei es goht los  
mir gön ob useputzt oder nit, ab uf d'Stross